



سلام عليكم ورحمة الله، كيف حالكم يا
أحباب؟ الله يبارك فيكم يا رب، ويرضى عنكم،
بسم الله، عاملين اياه؟ الحمد لله، الله يبارك
فيكم، الصوت واضح؟ طيب ما شاء الله الحمد
لله، اللهم بارك، يا مرحب بكم، طيب تمام،
الصوت واضح؟ يلا الناس اللي جاين من
الجروبات المبادرة اللي هي ملحقة بدورة فن
التعامل مع النفس، يقولوا أنا، عشان نعرف
في كام حد هنا من جروبات المبادرة، طيب
الله يبارك فيكم يا رب ويرضى عنكم يا رب،
ما شاء الله اللهم بارك، احنا كنا عملنا مبادرة

كدة ملحقة بدورة فن التعامل مع النفس، دورة
فن التعامل مع النفس اللي هي قريب، ما بين
الدورتين في العادة بيكون في فراغ، يعني احنا
في دورة تانية هتبدأ قريب ممكن بعد شهر أو
حاجة، في العادة بيبقى في ما بين الدورتين
فراغ، الدورة في العادة ما بين الدورتين
بيكون فيه فراغ، بيحصل شهر كدة، الناس
بتبقى ايه في اللالا كدة مش عارفين هم
بيعملوا ايه، فاحنا حبيننا نملى الفراغ دوت ما
بين دورة فن التعامل مع النفس والدورة اللي
جاية اللي هي هتبقى مفاجأة إن شاء الله، بإن
احنا نعمل نشاط جوة المجموعات، فكان فيه
مبادرة كده إن احنا كل أسبوع نتكلم في
موضوع محدد، ونعمل له تاسكات وحاجات
وظايف معينة تتعمل، ونكتب كل واحد وصل

لايه، بحيث إن احنا نتابع الناس، ونحول الكلام من كلام نظري إلى كلام عملي، هيبقى فيه مجموعة من الأوراد، مجموعة المقترحات للقراءة، مجموعة من الايه المهام اللي مفروض تتعمل، وحيكون المطلوب منكم إن انتم تتابعوا الايه المبادرة ديت، فأننا قررت إن أنا حيكون اللايفات ماشية مع المبادرة، يعني الأسبوع ده مثلاً المبادرة بتتكلم على التوبة، يبقى أنا النهاردة هتكلم على التوبة، الأسبوع الجاي مثلاً المبادرة هتكلم على كذا، فهتلاقوني بتكلم على كذا ده، اللي هو هيبقى مفاجأة الاسبوع الجاي، المهم يعني أنا خلاص متفاعل مع المبادرة، والمبادرة دي هترتب على اللايف ده نفسه هيترتب عليه مسابقة وتاسكات وكلام كده، عشان كده اللايف دوت

مهم قوي إن أنتم تركزوا فيه وتحرصوا على
إن كل واحد يكون معه ورقة وقلم، ورقة وقلم
ديت لأن في مسابقة، مسابقة عاملينها في
الجروبات على اللايف دوت، هي المسابقة
المسابقة هي مين هيكتب أحسن تلخيص
للايف؟ زائد يعمل أحسن قرارات يعني عايز
ورقة وقلم كده قبل ما نبدأ لايف تبقى معك
تكتب تلخيص الكلام اللي هقوله دي واحد،
نمرة اتنين إنك أنت تكتب القرارات اللي
هتترتب على اللايف دوت، أحسن حد هيكتب
تلخيص وأفضل قرارات هيطلع بها، قرارات
حقيقية صادق فيها، إن شاء الله هيكون له يعني
هيقولوا بقى في الجروبات كيف سيتم تكريمه
ونحو كده، فالمهم يعني الموضوع ده إحرصوا
عليه دلوقتي، طيب قبل ما أبدأ إحنا بنعمل

كالعادة شير تمام؟ للاي ف ده بسرعة ومنشن
بقى لكل حبايبنا أي حد عايزينه يحضر،
عشان النهاردة هنتكلم على التوبة فمطلوب كل
الناس تبقى موجودة بسرعة، طيب بالنسبة للي
قلته دوت اللي هو التلخيص بتاعك والقرارات
هتكتب فين؟ هتكتبها الأول وبعد كده تكتبها لنا
في بوست بعد اللايف ده على طول، في
بوست هينزل على صفحة دورات مهندس
علاء حامد، في صفحة على الفيسبوك أكيد
أغلبكم مشترك فيها اسمها دورات المهندس
علاء حامد، هتدور عليها هتلاقي في بوست
بعد اللايف ده على طول تروح داخل كاتب
كل الايه القصة بتاعتك فيه، وعلى أساس كده
هنقيم الناس وهيبقي فيه التكريم على أساس
التقييم دوت، تمام؟ يلا بنا، شير منشن، بسم

الله، الحمد لله وأشهد أن لا إله إلا الله وحده لا شريك له وأشهد أن محمداً عبده ورسوله صلى الله عليه وسلم، أما بعد....

أهلاً ومرحباً بكم في لايف جديد، بعنوان أسرار التوبة، أسرار التوبة، بنتكلم النهاردة في موضوع مهم وخطير خليني أبدأ معاكم بداية ١١ معينة كده أحياناً في ناس تبعثلي رسالة، بيجيلي رسايل كتير، يقولي: شيخ أنا إلتزمت من سنة أو من سنتين، فواحدة تقولي: والله أنا تبت قريب لسة قريب محافظة على الصلاة وكده، وأنا يا شيخ حلم حياتي أنا يا شيخ حلم حياتي، إن أنا أبقى زي حضرتك، أو إن أنا أبقى زي الداعية الفلاني أو الداعية العلاني أو نحو ذلك، فيعني حلم الحياة يعني، أو أوقات تقول لي مثلاً ابني نفسي ابني يبقى

زيك والكلام دوت، فالناس دايمًا بتعتقد بتعتقد
للأسف إن طالما إنت سبقتني في الوقت يبقى
أكيد سبقتني خلاص، وإن أنا إن أنا احصلك
أصلًا ده أمر مش هيحصل، ده أمر مستحيل،
ودي بداية غير موفقة تمامًا، ينبغي للانسان
مهما كان بعيد عن الله سبحانه وتعالى مهما
كان قصر أو فرط لفترة من الزمان إنه يعرف
إن ما فيش مشكلة إنك أنت تأتي ولو متأخر،
ما فيش مشكلة إنك أنت تتوب بعد ما كل
ويكون عندك رجاء في الله سبحانه وتعالى إن
أنت تبقى أفضل منهم وتتجاوزهم، وعندنا
أمثلة لا حصر لها في السنة، من ذلك عمر
رضي الله عنه وأرضاه، سيدنا عمر رضي الله
عنه وأرضاه تأخر إسلامه، أسلم بعد كالأام؟
بعد ناس كثير جدًا، وفي نفس الوقت سبق،

كذلك خالد بن الوليد، عمرو بن العاص، أبو
سفيان رضي الله عن الجميع، دي ناس أصلاً
أسلمت يعني يكاد يكون بعد عشرين سنة من
الدعوة الإسلامية، في ناس سبقوهم بحوالي
عشرين سنة، وفي نفس الوقت الناس ديت
وصلت وعدت وغابت ناس كثير كانوا
سبقوهم، أنا عايز أقول إن احنا أول قاعدة
بنقعدھا النهاردة لكل شخص يعني نفسه يتوب،
ونفسه يبقى حاجة كبيرة وعنده كده هزيمة
نفسية إن أنا مش هبقى حاجة أنا إتأخرت قوي
كدة، أنا سني كبر، نقول ليس العبرة ليس
العبرة بالتأخر، إنما العبرة بكمال النهاية لا
بنقص البداية، وهذه مسألة مهمة جداً، العبرة
بكمال النهاية لا بنقص البداية، إكتبوا أول

قاعدة معانا النهاردة، العبرة بكمال النهاية لا بنقص البداية..

إنما الأعمال بالخواتيم فكم من شخص كانت بدايته متأخرة ولكن كانت نهايته متكاملة؟ مثل الرجل الذي قتل مائة نفس، تأخر جدا جدا في توبته، ولكن في يوم واحد وصل إلى ما لم يصل إليه أحد، فالإنسان مهما كان بعيد مهما كان مقصر لا بد أن يكون عنده رجاء ما تقولش أنا نفسي أبقى زي فلان، لا هتبقى أحسن من فلان، أنا تأخرت جدا، أنا سني كبر، أنا بقی لی سنين ما صليتش انا مدمن ذنوب بقی لی قد كده. أنا هرجع متى؟ وهعمل متى؟ المسألة مش مسألة وقت. ممكن بقابه وبهمته العالية يسبق ناس كتير قوي سبقوه، لكن ماشيين ماشيين بالراحة، وكما يقولون

ليس العبرة بمن سبق ،ولكن العبرة بمن صدق
، تمام ليس العبرة بمن سبق، ولكن العبرة بمن
صدق، ودائما القصة اللي بيحكىها لنا زمان
المضحكة دي بتاعة الأرنب والسلحفاة،
الأرنب والسلحفاة على فكرة قصة ملهمة جدا
في كل حاجة، يعني أنا من الناس اللي بتحب
السلحفاة دي قوي بحس أن هي بتعبر عن
الواحد يعني، سلحفاة بس يعني مش استصغر
أي خطوة بعملها. يعني سلحفاة هو في الآخر
أنا سلحفاة، ماليش علاقة بالأرنب خالص،
بس أنا بحترم السلحفاة قوي، لأن السلحفاة ما
بتأسسش. ما بتوقفش، ما بتحبطش. مش معنى
أن هي شايبة الناس بتسبقها، أو أن هي همتها
ضعيفة أو أن هي يعني محدودة السرعة أن
دي خلاها تقف في يوم من الأيام. وإنما كانت

مستمرة تقول يعني العبرة أن ربنا يرأني أنا
مكمل أنا بحاول أنا بجاهد مش مهم بقى مين
هيوصل ومين مش هيوصل حاجة ترجع لله
سبحانه وتعالى. فالسلحفاة رغم البطء الشديد
اللي هي فيه ولكن كانت دائما بتكمل ، إذا لم
تستطع إلا أن تكون سلحفاة فكن سلحفاة ولكن
سلحفاة تستمر لا تياس لا تنقطع لا تقف لا
تحبط. وسبحان الله في القصة المشهورة أن
السلحفاة هي اللي فازت على الأرنب في
النهاية، لأن الأرنب كان عبارة عن بداية قوية
بداية قوية جدا، ولكن نهاية فاشلة. عشان كده
بنقول ليس العبرة بنقص البداية ولكن العبرة
بكمال بكمال النهاية في دي أول وقفة معنا
مجرد تحفيز لكل واحد فينا أن هو يعني إن
شاء الله هتبقى أحسن من كل اللي سبقوك.

■ **الوقفه الثانية** وهي نظرة تأمل في دعوة الله

لخالقه للتوبة، أنا الآن من الحاجات اللي بتخلي الواحد مثلاً أحنا قلنا حاجات أول حاجة بتحبطك إن أنت بتعتقد إن أنا طالما اتأخرت أو أنا بطيء عمري ما هوصل أو كل الناس هيسبقوني أو أو أحنا ردينا على دي. الحاجة الثانية أن البعض بيرى أن التوبة دي يعني بيستعظم أمر التوبة جداً، بيعتقد أن هو عمل حاجات كتير سيئة وصعب وأنا بعيد، ومش ممكن أوصل والكلام دي.

طيب بنقول القاعدة الثانية عشان تهون على نفسك الموضوع دي تأمل في آيات الله سبحانه وتعالى التي دعت الناس إلى التوبة، لما تجمع كده الآيات اللي ربنا دعا فيها الناس إلى التوبة أنت نفسك هتستغرب إزاي أنا ما عنديش

رجاء كبير جدا إن ربنا يتوب علي، لو أنا بس
أقبلت ورجعت له، إزاي كان ربنا دعى دول
للتوبة، فكيف الحال بي أنا؟ طيب تعالى نبدا
أبعد ناس في حياتك يعني أبعد ناس تتخيلهم
في حياتك ربنا دعاهم إلى التوبة، تعالى نمسك
كده فئة فئة وقارن نفسك بهم، هل أنت شبه
دول ولا أقل منهم؟ هل ذنبك زي دول ولا أقل
منهم؟ طيب نبدا مثلا بي أسوأ ناس المنافقين،
الله سبحانه وتعالى قال: **"إِنَّ الْمُنَافِقِينَ فِي
الدَّرَكِ الْأَسْفَلِ مِنَ النَّارِ وَلَنْ تَجِدَ لَهُمْ نَصِيرًا"**
النساء (145) ما فيش بص ما فيش أسوأ
من كده، **"إِنَّ الْمُنَافِقِينَ فِي الدَّرَكِ الْأَسْفَلِ مِنَ
النَّارِ وَلَنْ تَجِدَ لَهُمْ نَصِيرًا"**. {١٤٥} «سورة
النساء»، طب وبعدين الآية اللي بعدها على
طول؟ **"إِلَّا"**، يعني بعد في الدرك الأسفل من

النار، أكيد أنت أحسن حالة من هؤلاء، المنافق
منافق إعتقادي، قال: "إِلَّا الَّذِينَ تَابُوا
وَأَصْلَحُوا وَاعْتَصَمُوا بِاللَّهِ وَأَخْلَصُوا دِينَهُمْ لِلَّهِ
فَأُولَئِكَ مَعَ الْمُؤْمِنِينَ وَسَوْفَ يُؤْتِي اللَّهُ
الْمُؤْمِنِينَ أَجْرًا عَظِيمًا {١٤٦} مَا يَفْعَلُ اللَّهُ
بِعَذَابِكُمْ إِنْ شَكَرْتُمْ وَآمَنْتُمْ وَكَانَ اللَّهُ شَاكِرًا
عَلِيمًا {١٤٧}" المنافق! اللي هو أصلاً في
الدرك الأسفل من النار، يبقى آدي واحد ممن
دعي إلى التوبة، مين تاني ربنا دعاه إلى
التوبة في القرآن؟ سبحانه وتعالى دعا ناس من
أفزع ما يكون، وهم الذين قالوا إن الله هو
المسيح ابن مريم، النصارى الذين قالوا ذلك،
بل دعا الذين قالوا إن الله ثالث ثلاثة، تمام؟
كما قال سبحانه وتعالى: "لَقَدْ كَفَرَ الَّذِينَ قَالُوا
إِنَّ اللَّهَ ثَالِثُ ثَلَاثَةٍ..... {٧٣} «سورة المائدة»"

تخيل بشاعة هذا المنكر وعظم هذا الأمر عند الله، قال: "لَقَدْ كَفَرَ الَّذِينَ قَالُوا إِنَّ اللَّهَ ثَلَاثُ ثَلَاثَةٍ وَمَا مِنْ إِلَهٍ إِلَّا إِلَهُ وَاحِدٌ.. {٧٣}" بص
بقى التهديد، "وَإِنْ لَمْ يَنْتَهُوا عَمَّا يَقُولُونَ"
"وَإِنْ لَمْ يَنْتَهُوا عَمَّا يَقُولُونَ لَيَمَسَّنَّ الَّذِينَ
كَفَرُوا مِنْهُمْ عَذَابٌ أَلِيمٌ {٧٣}" "لَيَمَسَّنَّ الَّذِينَ
كَفَرُوا مِنْهُمْ عَذَابٌ أَلِيمٌ {٧٣}" الآية اللي
بعديها بتقول ايه؟ "أَفَلَا يَتُوبُونَ إِلَى اللَّهِ" أَفَلَا
يَتُوبُونَ إِلَى اللَّهِ وَيَسْتَغْفِرُونَهُ وَاللَّهُ غَفُورٌ
رَحِيمٌ {٧٤}" يا رب دول بعد ما قالوا الله ثالث
ثلاثة، قالوا المسيح هو الله، أنت تقول لهم
توبوا فقط واستغفروا وأنا أقبلكم! أكيد أنا مهما
عملت أكيد ذنبي أقل ممن قال إن الله ثالث
ثلاثة، أكيد أنا مهما فجرت ومهما بعدت أكيد
بُعدي مش هيكون زي بُعد من قال (إِنَّ اللَّهَ هُوَ

الْمَسِيحُ ابْنُ مَرْيَمَ). ودول اللي أنت بتقول
لهم(أَفَلَا يَتُوبُونَ إِلَى اللَّهِ وَيَسْتَغْفِرُونََهُ وَاللَّهُ
غَفُورٌ رَحِيمٌ). يا سلام! طب مين كمان يا رب؟
دعيت إلى التوبة. الله سبحانه وتعالى. دعا من
قتلوا أوليائه... من قتلوا أوليائه. قال الله
سبحانه وتعالى(إِنَّ الَّذِينَ فَتَنُوا الْمُؤْمِنِينَ
وَالْمُؤْمِنَاتِ) ثاني في _سورة البروج_ بيتكلم
على اللي حرقوا المؤمنين في الأخاديد. قال
(إِنَّ الَّذِينَ فَتَنُوا الْمُؤْمِنِينَ وَالْمُؤْمِنَاتِ ثُمَّ لَمْ
يَتُوبُوا فَلَهُمْ عَذَابُ جَهَنَّمَ وَلَهُمْ عَذَابُ الْحَرِيقِ).
الله يعني ايه الاية دي يا رب؟ يعني لو واحد
من الناس اللي فتنوا المؤمنين والمؤمنات
وصدهم عن سبيل الله وحرقوهم في الأخاديد..
كانوا سبب في فتنتهم وعملوا كل حاجة
وقتلوهم بسبب دينهم. لو تابوا، ربنا سبحانه

وتعالى يتوب عليهم. (إِنَّ الَّذِينَ فَتَنُوا الْمُؤْمِنِينَ
وَالْمُؤْمِنَاتِ ثُمَّ لَمْ يَتُوبُوا) امتى يعذبوا ؟ إذا لم
يتوبوا..

هذه دعوة من الله لهم أن يتوبوا إليه سبحانه
وتعالى. مين كمان يا رب ؟ مين كمان يا رب؟
مين كمان؟ أقولك.. كمان اللي أنفقوا كل
فلوسهم ..اللي أنفقوا كل فلوسهم في الكفر،
وفي الصد عن سبيل الله. ربنا دعاهم إلى
التوبة. وقال أنه يقبل منهم ويغفر لهم كل ذنب.
بس يبطله. فين ده يا رب ؟في سورة الأنفال.
قال الله تعالى(إِنَّ الَّذِينَ كَفَرُوا) ما لهم يا رب؟
(إِنَّ الَّذِينَ كَفَرُوا) ها ؟ ينفقون. (يُنْفِقُونَ
أَمْوَالَهُمْ لِيَصُدُّوا عَنْ سَبِيلِ اللَّهِ) اه كثير. جامد
.فظيع. (فَسَيُنْفِقُونَهَا ثُمَّ تَكُونُ عَلَيْهِمْ حَسْرَةً ثُمَّ
يُغْلَبُونَ) وَالَّذِينَ كَفَرُوا إِلَىٰ جَهَنَّمَ يُخْشَرُونَ.

لِيَمِيزَ اللَّهُ الْخَبِيثَ مِنَ الطَّيِّبِ) تمام.. (وَيَجْعَلِ
الْخَبِيثَ بَعْضَهُ عَلَى بَعْضٍ فَيَرْكُمَهُ جَمِيعًا
فَيَجْعَلُهُ فِي جَهَنَّمَ ۚ أُولَٰئِكَ هُمُ الْخَاسِرُونَ). الآية
اللي بعديها بتقول إيه بقى يا حلوين؟ قال
تعالى(قُلْ لِلَّذِينَ كَفَرُوا) لسه ربنا هيتكلم عنهم
اهو (قُلْ لِلَّذِينَ كَفَرُوا إِنْ يَنْتَهُوا _ان ينتهوا_
يُغْفَرْ لَهُمْ مَّا قَدْ سَلَفَ) (إِنْ يَنْتَهُوا يُغْفَرْ لَهُمْ مَّا
قَدْ سَلَفَ وَإِنْ يَعُودُوا فَقَدْ مَضَتْ سُنتُ الْأَوَّلِينَ).
إذا اللي أنفقوا كل أموالهم في الصد عن سبيل
الله...أنفقوا كل ثرواتهم في فتنة المؤمنين... إذا
إنتهوا بص إنتهوا دي إنتهوا توقفوا عن الذنب
وتابوا وعادوا الى الله؛ فان الله يقبل منه هذه
الايه؟ هذه التوبة. أكيد أنت لست اسوأ من
هؤلاء. أنت لست أسوأ من هؤلاء. لست اسوأ
من هذا المنافق لست اسوأ من النصارى. لست

أَسْوَا مِنْ الَّذِينَ فَتَنُوا الْمُؤْمِنِينَ وَالْمُؤْمِنَاتِ أَنْتَ
لَسْتَ أَسْوَا مِنْ مَنْ أَنْفَقُوا أَمْوَالَهُمْ فِي الصَّدَقَاتِ عَنْ
سَبِيلِ اللَّهِ. وَهَؤُلَاءِ جَمِيعًا دَعَا إِلَى التَّوْبَةِ بِلَا
مَنْعٍ مِنْ تَابٍ وَتَابَ اللَّهُ سُبْحَانَهُ وَتَعَالَى عَلَيْهِ.
تَمَام؟ يَبْقَى دَهْ دَهْ بِيَدَيْنِي أَمَلٌ إِذَا كَانَ رَبُّنَا قَالًا
لِدَوْلٍ تَوْبُوا. طَبَّ أَنَا يَعْنِي مَوْضُوعِي أَسْهَلُ
بِكَثِيرٍ أَكِيدُ بَعْدَ رَبُّنَا قَالًا فِي سُورَةِ الزَّمَرِ. قَالَ
(قُلْ يَا عِبَادِيَ الَّذِينَ) أَيُّهُ؟ أَسْرِفُوا. مَقَالَشْ بَقِيَ
الَّذِي عَمَلٌ مَعْصِيَةٌ وَاحِدَةٌ وَلَا سَابَ صَلَاةٍ وَلَا
مَقْصَرٍ فِي صَلَاةِ الْفَجْرِ؟ وَلَا عَمَلٌ عَادَةٌ سَيِّئَةٌ
مَرَّةً؟ وَلَا بِيَكَلَمٍ بَنَتْ مَرَّتَيْنِ وَلَا بِيَتَكَلَّمٍ لَا... قُلْ
يَا عِبَادِيَ الَّذِينَ أَيُّهُ؟ أَسْرِفُوا يَعْنِي مَدْمَنُ
مَعْصِيَةٍ كُلِّ يَوْمٍ عَشْرَاتِ مِائَاتِ الْمَعْصِيَةِ).
أَسْرِفُوا عَلَى أَنْفُسِهِمْ لَا تَقْنَطُوا مِنْ رَحْمَةِ اللَّهِ
إِنَّ اللَّهَ يَغْفِرُ الذُّنُوبَ جَمِيعًا (جَمِيعًا). إِنَّهُ هُوَ

الْغُفُورُ الرَّحِيمُ) الغفور الرحيم. فهذا يفتح لك
باب أمل. باب أمل. كان في الحديث المشهور
أن رجلاً_ كما يصف الصحابة_ جاء إلى
النبي عليه الصلاة والسلام. طب ما له الراجل
ده؟ قالوا جاء رجل للنبي عليه الصلاة والسلام
كبير وسنه كبير. قد سقط حاجباه على عينيه...
الحاجب أبيض. دقنه بيضاء كلها. ومن كثر
الايه؟ الحواجب أنتم عارفين ناس حواجبهم
بتتقل كده. نازل حواجبه على عينه حتى الناس
ايه.. مكرمش وحالته صعبة جداً. فراح للنبي
عليه الصلاة والسلام قال يا رسول الله أرأيت
رجلاً فعل المعاصي كلها؟ عمل كل المعاصي
بتتخيلها. كل حاجة تتخيلها. أرأيت رجل عمل
المعاصي كلها؟ هل له من توبة؟ هل له من
توبة؟؟ قال ما تركت حاجة ولا داجة. لو

قسمت خطيئته لو قسمت خطيئته على أهل
الأرض لو سعتهم. لو قسمت خطيئته على أهل
الأرض لو سعتهم. فقال له النبي صلى الله عليه
وسلم تشهد أن لا اله الا الله وأني رسول الله؟
قال نعم. فقال له صل الله عليه وسلم تعمل
الحسنات..تعمل الحسنات. وتترك السيئات.
يجعل الله لك كلها حسنات. يجعل الله لك كلها
حسنات. يخاليك كل السيئات دي يقلبها لك
حسنات. فراجل من كثر ما هو مش مصدق
عايز يؤكد عليه يعني عايز يقول له بس ممكن
ما تكونش واخذ بالك. قال وغدراتي وفجراتي.
قال وغدراتي قال وغدراتك وفجراتك. قال
وغدراتي وفجراتي؟ قال وغدراتك وفجراتك.
وغدراتي وفجراتي؟ قال وغدراتك وفجراتك.
راجل من كثر ما هو مذهبول ماشي مش

مصدق نفسه وهو قاعد ماشي ماشي ساب
النبي عليه الصلاة والسلام يقول وهو ماشي
قعد يقول الله أكبر الله أكبر الله أكبر الله أكبر
لغاية ما اختفى عن عين النبي عليه الصلاة
والسلام إنت أكيد أكيد مش زي الراجل ده.
أكيد ذنبك مش هيكون زي ذنب الايه؟ مش
هيكون زي ذنب الراجل ده صاحب الغدرات
والفجرات.

فدي أول رسالة ﴿الرسالة الثانية اللي
بنبعتها انهارة وهي رسالة أمل الله دعا أسوأ
منك بكثير أن يتوبوا.

فذنبك لن يكون أكبر من ذنب هؤلاء ومن دعا
هؤلاء يدعوك أيضاً ومن يقدر أو من رَحْمَتُهُ
تسع هؤلاء لا شك أن رحمته تسع ذنبك الذي
هو أصغر من ذلك بكثير.

فلا تستعظم الذنب وانظر إلى سعة رحمة
الرب.

طالما أقبلت وتبت فلك عند الله توبة مقبولة
بإذن الله _ سبحانه وتعالى _ . الوقفة الثالثة:

لقد قال _ سبحانه وتعالى _ عن الأنبياء
"**أُولَئِكَ الَّذِينَ هَدَى اللَّهُ فَبِهِدَاهُمْ أَقْتَدِهِ**"
عايزك تشوف بقى الأنبياء وهم بيسارعوا إلى
التوبة وكيف تعامل الله معهم.

الله _ سبحانه وتعالى _ قال عن موسى _ عليه
السلام _ "**فَوَكَزَهُ مُوسَى فَقَضَى عَلَيْهِ**" .
وكزه موسى يعني ضرب الراجل غلط " قَالَ
هَذَا مِنْ عَمَلِ الشَّيْطَانِ " ، قال هذا إيه؟ من
عمل الشيطان ..

" إِنَّهُ عَدُوٌّ مُضِلٌّ مُبِينٌ (15) " قال ربي
إني ظلمت نفسي " بص السرعة "قال رب
إِنِّي ظَلَمْتُ نَفْسِي فَاغْفِرْ لِي فَغَفَرَ لَهُ ۖ إِنَّهُ هُوَ
الْغَفُورُ الرَّحِيمُ (16)".

الله! الآية دي بتجعل الإنسان يعني يذوب حبا
وشوقا لله _تعالى_.

وهذه الفاء فاء السرعة فاء السرعة فاء
السرعة.

" فَاغْفِرْ لِي فَغَفَرَ لَهُ ۖ " فالسرعة " إِنَّهُ هُوَ
الْغَفُورُ الرَّحِيمُ (16) "

"قال ربِّ بِمَا أَنْعَمْتَ عَلَيَّ" ؛يعني بالتوبة "
فَلَنْ أَكُونَنَّ ظَهِيرًا لِلْمُجْرِمِينَ". الله أكبر الله
أكبر...

ربنا_سبحانه وتعالى_ قال عن داوود_عليه السلام_ قال " وَظَنَّ دَاوُودُ أَنَّمَا فَتَنَّاهُ فَاسْتَغْفَرَ رَبَّهُ وَخَرَّ رَاكِعًا وَأَنَابَ ﴿١﴾ " قال الله " فَغَفَرْنَا لَهُ ذَلِكَ ^طوَإِنَّ لَهُ عِنْدَنَا لَزُلْفَىٰ وَحُسْنَ مَّآبٍ " .

الله أكبر الله أكبر ! يا رب لم تغفر له بس كمان عملت له منزلة قريبة منك زلفى وحسن مئاب يرجع إلى مكانة عالية في الجنة. قال وظن داوود أنما فتناه، عمل إيه؟

لم ييأس لم يتأخر لكن سرعة التوبة كلمة السر و سرعة التوبة.

كلمة السر " فَاسْتَغْفَرَ رَبَّهُ وَخَرَّ رَاكِعًا وَأَنَابَ ﴿١﴾ " بص"خَرَّ" دي تـوحي بمدى الـذل والانكسار وده من أسرار التوبة.

بص هنا الآية دي فيها سرين من أسرار
التوبة:

السرعة والذلة أي السرعة فاستغفر ربه وخر
راكعًا دي الذلة والمسكنة. وخر راکعاً وأناب
على طول يبجي بعديها فاء السرعة زي ما
أنت تبت بسرعة نغفر لك بسرعة.

سريع التوبة والله سريع المغفرة _ سبحانه
وتعالى _.

"قال فغفرنا له ذلك"... مش بس كدة "وَأَنَّ لَهُ
عِنْدَنَا لَزُلْفَىٰ وَحُسْنَ مَّآبٍ".

الله أكبر ————— ر الله أكبر ————— ر!

"وَاللَّهُ يُرِيدُ أَنْ يَتُوبَ عَلَىٰكُمْ" . آدم عليه

السلام عندما أكل من الشجرة. آدم هو أول

مخلوق هو أول بشر لسة ميعرفش هو
المفروض أنا لما أعمل غلط يحصل إيه؟

فانظر إلى هذا المشهد الذي لابد أن أنت دائماً
تفكر فيه كثير؛ لأن كل توبة إحنا بنتوبها هي
فرع عن هذا المشهد. إيه هو المشهد دا؟ فكر
معايا كدة إيه هو المشهد اللي أنا قصدي عليه.

آدم_عليه السلام_ الآن أخطأ "وَعَصَى آدَمُ
رَبَّهُ" أكل من الشجرة خلاص اللي حصل
حصل.

ط ب ماذا يفعل آدم الآن ؟

هو الآن أول البشر هذه أول معصية من
بشري، ماذا أفعل أنا يعني؟ أنا الآن أخطأت
ماذا أفعل؟...

ربنا _ سبحانه وتعالى _ يريد أن يتوب علينا
، فلأنه يريد أن

يتوب علينا علم آبانا آدم ماذا يقول فقال آدم
هذه المقالة فقبل الله منه ... يا سلام فالتوبة منه
وإليه - سبحانه وتعالى - (ثُمَّ تَابَ عَلَيْهِمْ
لِيتُوبُوا إِنَّ اللَّهَ هُوَ التَّوَّابُ الرَّحِيمُ) التوبه الآية
118."

الله _ سبحانه وتعالى _ علم آدم كيف يتوب
فتاب آدم فقبل الله توبة آدم يا سلام .. يا سلام
.. الله أكبر.. الله أكبر ..

■ قال الله تعالى فتلقى آدم من ربه مش آدم اللي
قال آدم أتعلم الأول قال تعالى : (فَتَلَقَّى آدَمُ مِنْ
رَبِّهِ كَلِمَاتٍ فَتَابَ عَلَيْهِ إِنَّهُ هُوَ التَّوَّابُ الرَّحِيمُ)
البقره الآية 37 "

■ دي الآية دي تتبروز في حياتك إن كل توبة
أحنا بنتوبها هي من تعاليم الله لنا هو ربنا اللي
علمنا قال لنا قولولي كده أنا أقبل منك على
طول يارب يعني أنت اللي تقول لنا نقول إيه ؟
فأحنا نقولو فأنت تسامحنا ؟ آه هو يحب ذلك.

■ فآدم _ عليه السلام _ قال إيه ؟ هو أتعلم
الكلمات قال ربنا ظلمنا أنفسنا ... ظلمنا أنفسنا
وإن لم تغفر لنا وترحمنا لنكونن من الخاسرين
ربنا ظلمنا أنفسنا... وإن لم تغفر لنا وترحمنا
لنكونن من الخاسرين.

■ هي دي الكلمات اللي تلقاها آدم من الله ،
ربنا علمه لما تغلط قول كده بس وأنا أقبل منك
و أسامحك فتاب عليه ، على الرغم من إن هو
اللي معلمه هو علمه التوبة و قال له قول كذا

قال يا آدم بس فتاب عليه إنه هو التواب الرحيم.

■ أمر عجيب والله ، لذلك أحد السلف كان يقول إني لأعلم متى يغفر لي ، فقالوا له متى يغفر لك ؟ قال إذا ألهمني الله الإستغفار فإنه سيغفر لي فإنه لولا أنه يريد أن يغفر لي ما ألهمني الإستغفار ... لولا أنه يريد أن يغفر لي ما ألهمني الإستغفار.

■ والنبي _ عليه الصلاة والسلام _ يقولون كنا نعد للنبي. _ عليه الصلاة والسلام _ في المجلس الواحد يقول أكثر من مئة مرة " أستغفر الله العظيم وأتوب إليه " أستغفر الله العظيم و إليه ؟ .. وأتوب إليه فهذا حال نبينا _ صلى الله عليه وسلم _

■ الله يحب التائبين و يفرح بتوبتهم _ سبحانه
وتعالى _

طيب خرينا نقول ملامح أحنا كده إيه أديننا إيه
مقدمات سريعة .. مقدمات سريعة ، طيب
خرينا نقول بعد كده بعض الخواطر.

■ أولا الله _ سبحانه وتعالى _ في القرآن قسم
الناس إلى قسمين لا ثالث لهما إما تائب وإما
ظالم ... إما تائب وإما ظالم.

■ قال الله تعالى (وَمَنْ لَّمْ يَتُبْ فَأُولَئِكَ هُمُ
الظَّالِمُونَ) الحجات الآية (11)

■ بس هي خلاصة الحياة تائب و ظالم فهل
أنت تائب ؟ أم أنت ظالم؟ قال تعالى ومن لم
يتب ومن لم إيه؟ يتب فأولئك هم الظالمون ...
إما تائب وإما ظالم فنسأل الله _ سبحانه

وتعالى _ أن يجعلنا وإياكم من التائبين ولا
يجعلنا من الظالمين ربنا ظلمنا أنفسنا وإن لم
تغفر لنا وترحمنا لنكونن من الخاسرين.

■ طيب خلينا نقول محور تانى وهو ما هي
التوبة التي يحبها الله _ سبحانه وتعالى _ ؟
ما هي الشروط التي ينبغي أن تتوفر في التوبة
؟ شروط ، في شروط وفي آداب.

يعني مثلاً أحنا نقولو ليه السرعة ؟ الذله ديه
إيه؟ ممكن تكون آداب في التوبة أو محسنات
للتوبة.

■ لكن في شروط ميفعش تُقبل توبة إلا أن
تتوفر فيها هذه الشروط.

■ الشرط الأول لكي تكون توبتك توبة مقبولة
عند الله ، الشرط الأول الندم .. الندم .. الندم

، وفي الحديث " الندم توبة " الندم توبه ... في
الحديث الندم توبة.

والندم هو بداية التوبة فعلاً فقول الندم توبة
يعني بداية التوبة فلا توبة بلا ندم بمعنى كيف
يعني يقال إنسان تاب إذا لم يندم ؟ لأنه لا
يتصور لا يتصور شخص غير نادم أن يكون
تاب توبة خالصة لله ، لأنه ممكن يتوب بس
نشك أن توبته لله بمعنى هل يمكن شخص يقلع
عن الذنب بدون ندم ؟

نعم ممكن يحصل بس عادة يكون إقلاعه عن
الذنب...

ممكن يحصل بس عادة يكون إقلاعه عن
الذنب مش لله -سبحانه وتعالى- ؛ لأن لا يمكن
يكون إنسان عاد إلى الله ، وفي نفس الوقت
مش ندمان على التفريط ، ولا التقصير.

بمعنى هل ممكن واحد يتوب بس هو مش
ندمان؟ اه ممكن. ازاي؟ واحد بطل سجاير
علشان اه مراته مش بتطيقه علشان موضوع
السجاير، وكانوا هيوصلوا للطلاق، وكده ،
والموضوع كبر. فبطل السجاير ؛ علشان
يحافظ على بيته ؛ فاديه هو مش ندمان على
التدخين ؛ لكن هو تاب من أجل ذلك، واحد
تاب مثلاً من المخدرات علشان ما عهوش
فلوسها. ما عهوش فلوس يشتري مخدرات
فتوقف عن شرب المخدرات. تمام؟ واحدة
تابت مثلاً من التبرج علشان جوزها بيغير
عليها. ما ما بيحبهاش إن هي تبقى حاطة
(ميك أب) برة البيت أو لابسة ضيق ؛ فهي
علشان بس جوزها بيغير عليها قررت هي
الموضوع دوت لكن هي مش ندمانة على

التبرج ،ولو سـنحت لها الفرصة، أو جوزها
أذن لها عادي جدا هترجع هتلبس الضيق
هتلبس اللي هي عايزاه هتخط (ميك أب) لو
وافق . فلو جه فرح مثلاً وقال لها : أنا موافق
النهاردة تلبسي ضيق أنا موافق فى الفرحة
كاستثناء بس مش هنعمل كده تاني آآ هنبطل
هتلبسي بس ضيق عشان ده فرح أختك حطي
(الميك أب) اللي أنت عايزاه، والبسي فعلت
كده فهذا دليل دليل إنها لم تتب إلى الله. للأسف
لم تتب إلى الله، وإنما كانت توبتها إرضاء
لزوجها" بس. فهنا أه شكلها في الظاهر
أقلعت، ووقفت. بس في الباطن التوبة لم تكن
خالصة لله -سبحانه وتعالى-. لا وده هظهر لما
سبب الامتناع زال. جوزها قال لها : فرح
أختك أعلمي اللي أنت عايزاه. فرح أختك بس

بعد كده ما عنديش (ميك أب) ما عنديش
ضيق؛ فعادي جداً جت فرح أختها لبست
الضيق، وحطت (الميك أب) ، وخربت الدنيا
قدام الرجالة الأجانب تمام؟ طبعاً لو قدام
النساء عادي بس. هتكلم قدام الرجال الأجانب؛
فهذا يدل على أنها لم تتب في الحقيقة. وهذه
التوبة ليست لله - سبحانه وتعالى- وإنما علشان
بس جوزها ما يزعلش منها. فديت مصيبة
كبيرة؛ فهنا يبقى في الظاهر أقلعت ، وتوقفت،
ولكن في الباطن فقدت شرط من شروط
"التوبة المقبولة". في أنها لم تندم، وبالتالي
طالما لم تندم ده يدل على أنه يطعن في صدق
الأيه؟ صدق التوبة، وأحياناً بيظهر كمان
عدم الندم دوت في "فلتات اللسان" . مثلاً
تبقى واحدة واحدة قاعدة مع صديقاتها تمام.

وبحجابها عادى، وكل حاجة وما فيش أي مشكلة. بعد كده بتقعد مثلاً شافت بنت ماشية، حلوة لبسه حلو، قمورة، وبتاع؛ فتقعد تتباهى بتاريخها تقول: أنا لما كنت زمان زيها كنت مكسرة الشارع كان كل الرجالة بيعاكسوني. كنت أجمل بنت في الجامعة. كنت خرابها. كان كل الرجالة بيتمنوني فاه ده يدل يعني كيف يعني؟ كيف يكون حد تائب ويقعد يفتخر بتاريخ المعصية تمام؟ أو واحد مثلاً كان زمان لا مؤاخزة صايع، مثلاً ولا بلطجي، ولا ولا كان سبّاب، ولا بتاع فيجي في يوم كده حصل خناقة، ولا بتاع يقول له: بس أنا لو أرجع لك زمان. ده أنا كنت، وكنت، وما كانش حد يقدر علي، وكنت بعمل، وبساوي، ويقعد يحكي على سبيل الافتخار، وعلى سبيل

التباهي، ولما كمان يذكر يقول له: أنت ما تعرفش زمان ده فلان ده كان عامل ،ومسوي ،ومقطع، وبتاع هو يفرح إن سمعته كده يعني. فده "شيء غريب" الصراحة. المفترض الإنسان إذا ذكر الذنب بكى، بكى، وتأثر إن حد يعرف "القصة" ديت، ولو حكاها ،ولو حكاها لسبب ما زي ما "كعب بن مالك" حكى قصة توبته. بيحكي على سبيل (العبرة، والعظة). فيقول :أنا كنت وحش زمان، وربنا غفر لي ،وربنا يعني تاب عليّ، واتعلمه من قصتي، وأنا بنصحكم لله. بيحكي مش على سبيل التباهي والمنظرة، والفشخرة. فكيف يجتمع الندم مع التباهي؟ الإنسان يتباهى بتاريخ المعاصي. ففي "حاجات غريبة" بتحصل بين الناس. مفترض الإنسان أولاً يبقى

مش عايز حد يعرف لإن هو بيستحي من
الماضي بتاعه دوت. تمام؟ هو بيضايق من
الماضي دوت. ما بيحبش حد يفكره به أصلاً،
ولو حصل، واضطر إن هو يحكيه، أو إتحدى
قدامه. بيبقى متأثر جداً، وندمان، وبيستغل
الموقف في (الدعوة، والعبرة، والعظة). زي
ما "كعب بن مالك" حكى قصته حكهانا ليه؟
قصة توبتة حكهانا ليه؟ حكهانا ؛عشان كلنا
قاعدين نتعلم منها لغاية دلوقتي. وكان فيها
كمية ندم غريبة. كمية ندم مهولة ظاهرة في
القصة. زي ما "كعب بن مالك" قال: وهو
بيتكلم في القصة بيقول: قعدت أجهز نفسي،
وأقول: الحق الجيش بكرة.. الحق الجيش
بكرة. الحق الجيش بكرة. فقال: حتى لم يقدر
لي ذلك. ثم قال: ويا ليتني فعلت. فاكرين

القصة دي؟ قال : ويا ليتنى فعلت يعني تخيل "
مالك" بيحكى القصة دي في آخر حياته
بيحكىها لابنه. "كعب بن مالك" كان كبر
، وعمي ، وخلص خلاص آخر حياته بيحكىها
"لابنه" ..

لابنه. وهو بيقول لابنه وهو في سياق الكلام
كده بيقول له انا قعدت أجهز نفسي واتأخر
لغاية ما الجيش بعد قوي. وبيقول لابنه بيقول
ليه؟ يا ريتني يا ريتني طلعت بدري. يا ريتني
طب انت بتحكي القصة بعد قد ايه؟ انت لسه
بتقول يا ريتني؟ آه ... ما هو لسه لغاية دلوقتي
متألم. لغاية دلوقتي ندمان ولسه لغاية دلوقتي
بيتأسف إن هو أنا ليه ما طلعتش بدري؟ رغم
أن ربنا تاب عليه ونزل فيه قرآن، بس إن أنا
ما كونش عملت الذنب أحسن من إن إيه؟

أحسن من إني ندمت... يبقى ندم على ما
سلف... يبقى انت تندم على زمان لما كنت
بتمشي مع بنات، زمان لما كنتي بتكلمي ولاد،
زمان لما كنت بتعمل عادة سرية، زمان لما
كنتي بتشوفي افلام إباحية، زمان لما كنتي
بتشوفي مسلسلات وأفلام، زمان لما كنتي
بتغتابي وبتتلمي وبتسبي، زمان لما كنت
بتشرب سجائر ومخدرات، المفروض كل ما
تذكر هذه الذنوب.. تتألم، وكل وكل ما تتأسف
على كل حاجة وقعت منك. تمام؟ مش إن أنت
تتفاخر وتتباهى، فإذا حصل الندم

فالندم ده التوبة لأن هو الندم اللي هيترتب
عليه استعظام الذنب، واستعظام حق الرب،
وبعد كده الإقلاع وعمل الصالحات.

من الشروط الأساسية العزم على عدم العودة،
الإقلاع الدائم والعزم على عدم العودة. تمام؟
"طيب... الاقلاع يعنى أن أنت تنتهي بقى

" فَهَلْ أَنْتُمْ مُنْتَهُونَ آيَةَ ٩١ من سورة المائدة..
انتهينا... تمام

فالإنسان ينبغي ألا يجمع بين توبة
واسـتمرار....يبقى ده عبث. احنا بنهـزر
كده...واحد مثلا يوم ما بيصليش وكل يوم
بالليل يستغفر وتاني يوم ما يصليش وبالليل
يستغفر... ويقول أنا بصحى الصبح الساعة
ثمانية أروح الشغل وكل يوم بعد الساعة ثمانية
أصلي ركعتين كده ويستغفر وبتاع وبيزن ان
هو بيتوب. اه ممكن يكون ندمان نوعا ما لكن
فين الاقلاع؟ فـين محاولة التغيير أصلا؟ فـين
إنك رافض للذنب؟ فالإنسان ينبغي أن هو

يقلع؟ وإذا أُلِّع ينبغي أن يقلع إقلاعا مستمرا
يعني ايه؟ يعني ينوي ألا يعود... فمن التوبة
الناقصة أن انسان يعزم على أن يتوب فترة
محددة. أعطيك مثلا.. كثير بتحصل. مثلا بنت
طالعة عمرة مع أهلها طالعة عمرة فطبعاً ايه؟
عمرة بقى يعني نلّم نفسنا بقى شوية بقى. فايه؟
فتبتدي تقول خلاص أنا هنا في العمرة دي
مش هلبس بنطلونات، مش هحط ميك اب مش
هسمع أغاني، مش هشوف مسلسلات، وفعلاً
تعزم على ذلك مع العزم على أن ترجع لكل
ده بعد العمرة. هي ناوية لما ترجع من العمرة
هرجع ألبس بنطلوناتي ضيقة تاني. . هرجع
أحط الميك اب بتاعي تاني. . هرجع أسمع
أغاني وأفلام.. العمرة عشان ايه يبقى برضو
حرمة المكان والزمان. فهذه توبة ناقصة..

توبة ناقصة جدا مطعون فيها.. الصبح إني
بتوب عشان ندمان وعشان استعظام الذنب..
طب ايه الفرق بين العمرة وبعد العمرة؟ هو أنا
بتوب عشان العمرة؟ ولا انا تببت عشان الرب؟
طب انا رجعت من العمرة مش ربنا هو ربنا
ولا اتغير؟! ولا ربنا بتاع مكة غير ربنا اللي
في مصر مش حد يفهمنا يا جماعة حد يفهمنا.

أو بيحصل إن بنت مثلا تيجي قبل الامتحانات
بأسبوعين معروف هم أسبوعين تتوب من كل
الذنوب والمعاصي تقول لك بقى الامتحانات
وعايزين ربنا يكرمنا توبة المصلحجي ربنا
يكرمنا صلاة فجر حاضر.. أذكرك في وقتها
حجاب تمام ما فيش أغاني ما فيش مسلسلات
ما فيش كلام مع ولاد تقول لك عاوزين ربنا
يكرمنا في الامتحانات... ودخلت امتحانات

وربنا كرمها فعلا. سبحان الله! أول ما
خلصت المصلحة يوم الامتحانات ما خلصت
لبست أسوأ ثيابها على الاطلاق أشدها تبرج
وأشدها ضيق وحجرت سينما مع صاحباتها
وراحت السينما وسمعت وشافت ويمكن عملت
ميعاد مع الولد اللي كانت مصاحباه و قطعت
معه آخر أسبوعين في الامتحانات عشان ربنا
يكرمنا وبتاع. هل هذه توبة؟ هذه ليست توبة.
دي مش توبة دي. احنا كده بنهزر. اه الذنوب
اقل شوية وأحسن من ما فيش. بس دي مش
التوبة اللي احنا بنتكلم فيها اللي ربنا أثنى فيها
على التائبين ويحب التائبين طبعاً الشباب
بيعملوا زي البنات وأكثر طبعاً، بس أنا بتكلم
أن لما يبقى البنت بقى أصعب وأصعب يعني
فيه ايه اللي بيحصل؟ يعني احنا ليه بنتحول؟

هل ربنا قبل الامتحانات غير ربنا بعد الامتحانات؟

تمام؟ هل ربنا بقى الإمتحانات بيتجاوز عشان
ده يوم الامتحان

ما خلص وبتاع، فربنا بقى يعلم إن آخر يوم
امتحان ولا عشان ده فرحي في الفرح ممكن
نخربها عادةً ده يوم الفرح فربنا يعلم بقى ده
يوم الفرح فنخربها، ما فيش مشكلة فين يا
جماعة؟ فين فين الصدق؟ تمام؟ أنا المفروض
أعزم ألا أعود.

تمام؟ زي مثلاً حد ببيجي في رمضان وده
كثير بقى جدًا في رمضان تخش ما شاء الله
تتحول تتحول حلو.

بتلبس لبس واسع بتلبس لبس فضفاض، بتلبس
لبس ما فيهوش غامق وكده. غامق وكده مش
ملفت والكلام ده. صلاة تراويح صلاة فجر
صلاة عصر بتاع ورد قرآن، بلاش بقى
مسلسلات في رمضان بعد رمضان هو في
يوم العيد كل حاجة خربت.

كل حاجة بتبوظ يوم العيد يوم العيد أسوأ ثياب
الصلاة بتضيع أفلام مسلسلات سينمات
كافيهات أصحاب ولاد خربت هنا يا جماعة.

دي توبة ايه دي يعني فين التوبة هنا؟ طب
توبة يعني العزم على عدم العودة. العزم على
عدم العودة.

انا انا ندمت قرب رمضان هو رب الإمتحانات
هو رب قبل رمضان. هو رب بعد رمضان
هو رب بعد الامتحانات هو رب الكعبة هو

رب العمرة هو رب مصر هو رب السعودية
في إيه؟ لو أنا تائب إلى الله فهل تغير الله؟ هل
في فرق؟ يعني في إيه؟ يبقى أنا لازم ما
ارجعش ده المنطقي. لا أنا بعامل ربنا ولا
بعامل الكعبة ولا بعامل الامتحان؟ ولا أنا بقى
يصدق في قول الله تعالى: "وَإِذَا مَسَّ الْإِنْسَانَ
ضُرٌّ دَعَا رَبَّهُ مُنِيبًا إِلَيْهِ ثُمَّ إِذَا خَوَّلَهُ نِعْمَةً مِّنْهُ
نَسِيَ مَا كَانَ يَدْعُو إِلَيْهِ مِنْ قَبْلُ وَجَعَلَ لِلَّهِ أَنْدَادًا
لِّيُضِلَّ عَنْ سَبِيلِهِ ۚ قُلْ تَمَتَّعْ بِكُفْرِكَ قَلِيلًا ۖ إِنَّكَ
مِنْ أَصْحَابِ النَّارِ (8) "الزمر اليك ٨. آه لما
في مصلحة امتحانات هادعا ربهم ثم إذا خوله
نعمة منه نسيا ما كان يدعو إليه من قبل.

دي توبة المصلحي توبة المصلحة. وإياك
تكون مصلحي مع ربنا.

من أداء من الحاجات المهمة في التوبة هي
حسن الاعتذار إلى الله. إن أنت، احنا قلنا إيه
الندم؟ الإقلاع العزم مع العدم الاول. طيب
سؤال خرينا برضو في حنة العزم على العزم.

﴿ افرض أنا تبنت ورجعت تاني.﴾

انا دلوقتي تبنت قلت والله أنا هبطل هبطل اه
اسمع اغاني. وفعلا بطلت شهر شهرين ثلاثة
وبعد كده الصراحة سمعت؛نزل بقى تراك
جديد كده للفنان الفلاني فانا ما قدرتش دخلت
سمعتة، بس أنا بصراحة ما كنتش ناوي يعني
ما كنتش ناوي كنت ناوي إن أنا ما أعملش
كده بس يعني الإنسان ضعيف بقى وكده شيخنا
وبتاع. الصراحة أنا دخلت سمعت مش قادر
كنت عايز أعرف بس هو تامر حسني آخر
أغنية بتاع فدخل وزعلت بعديها وبعد كده قلت

خلاص أنا سامحني يا رب أنا مش مش هعمل
كده تاني وفعلا تبت تاني، هل أنا كده توبتي
مش مقبولة؟

الاجابة: التوبة مقبولة التوبة الأولانية
دي مقبولة والتوبة الثانية إن شاء الله
مقبولة.

إنّ بتقول لي طب ما أنا رجعت أهو في فرق
إحنا بنقول ايه؟ العزم على عدم العودة اكتبوا
الملحوظة: دي ملحوظة خطيرة جدا إحنا ما
قلناش الشرط عدم العودة، إحنا قلنا الشرط
ايه؟ على عدم العودة تاني إحنا ما قلناش
الشرط عدم العودة لأن ما فيش حاجة اسمها ما
حدش ما فيش حد مش هيغلط هنغلط كلنا. إحنا
قلنا العزم على عدم العودة، إن إنت تنوي ما
ارجعش بس لا قدر الله حصل بعد شوية

وقعت وقع هل معنى كده إن التوبة الأولانية
مش الإجابة لأ، الاجابة مقبولة. ليه؟ لإن إنت،
هل إنت في التوبة الأولانية لما بدأتها كنت
ناوي ما ترجعش؟ اه، طب بعد فترة؟
الصراحة وقعت، خلاص قمت بسرعة؟ ده
السؤال قمت بسرعة ورجعت؟ اه، قمت
بسرعة ورجعت ونويت ما ارجعش ثاني.
خلاص التوبة الأولى مقبولة والتوبة الثانية
مقبولة والذنب اللي في النص ده لو صدقت في
التوبة الثانية كمان يتغفر لك.. وَالَّذِينَ إِذَا فَعَلُوا
فَاجِشَةً أَوْ ظَلَمُوا أَنْفُسَهُمْ ذَكَرُوا اللَّهَ فَاسْتَغْفَرُوا
لِدُنُوبِهِمْ "

فالسريعة اهو لدنوبهم. وَمَنْ يَغْفِرُ الدُّنُوبَ إِلَّا اللَّهُ
وَلَمْ يُصِرُّوا عَلَى مَا فَعَلُوا وَهُمْ يَعْلَمُونَ (135)
آل عمران ١٣٥ والنهاية وَلَمْ يُصِرُّوا عَلَى مَا

فَعَلُوا وَهُمْ يَعْلَمُونَ. أُولَئِكَ جَزَاؤُهُمْ مَغْفِرَةٌ مِنْ رَبِّهِمْ وَجَنَّاتٌ تَجْرِي مِنْ تَحْتِهَا الْأَنْهَارُ خَالِدِينَ فِيهَا وَنِعْمَ أَجْرُ الْإِيَّاهِ؟ الْعَامِلِينَ. صح؟ فدي دي مسألة مهمة جداً. وده بيحصل كتير مثلاً في حاجة زي العادة السرية

مهمة جداً وده بيحصل كتير مثلاً في حاجة زي العادة السرية والإباحية.

شباب كتير بيقول لي : والله يا شيخ أنا تبت ومسكت نفسي أسبوعين ثلاثة بس عملتها. فأقول له : ما خلاص يعني طب بعدين قال لي : ندمت وبكيت زعلت من نفسي وإن شاء الله مش هرجع ثاني .

خلاص خلاص يعني ما فيش حد ما بيغلطش يا جماعة - ما فيش حد ما بيغلطش - يعني لا داعي لجلد الذات.

ما هو الشيطان بيخش لك أحياناً من اليأس ،
من الخوف ، يقول لك : أنت رجعت أنت ما
فيش فايده فيك، أنت ما فيش أمل، أنت
خلاص أنت توبتك مش مقبولة ، قل له : لأ.

أنا دلوقتى هـي الشـرـوط

👉 أنا كنت نـدـمان؟ اهـ.

👉 أقنعت لما أنا تبت؟ اهـ.

👉 عزمت على عدم العودة؟ اهـ .

طب خلاص بقى إطلع منها بقى. إن شاء الله
توبتي مقبولة ملكش فيه.

أنا يا عم غلطت خلاص كل بني آدم خطاء ،
أنا يا عم غلطت ربنا يحب التوابين وتبت.
عايز ايه تاني؟ توبة جديدة؟ جددت توبة !

يتجدد لك الأمل ، يتجدد لك الأجر - خلصت

يبقى إيه؟! يبقى الموضوع نفهم يعني فرق
بين عدم العودة والعزم على عدم العودة - لأ
إحنا بنقول العزم مقلناش عدم العودة وإلا
طبعاً مش بجرأك يعني إن أنت تعمل معصية
- بس هقولك إفرض وقعت زي ما كلنا بنقع
معلش مين فينا مبيصش للنساء كل فترة كلنا
بنعمل كده أتقى الأتقياء بيقع فيها مين فيكم يا
بنات مبتغتبش كل فترة كلنا بنقع. وكلكم بتقعوا
أول ما يجي الدودو دودو كده مع بنات وبتاع
ويلا وجبنا سيرة فلانة وقعنا.

طب نتوب بسرعة، ونعزم إن إحنا هنمسك
نفسنا في الحوارات الجاية وهاخد بالي، و ما

أجيبش سيرة حد بالسوء. صح ؟ مين فيكم ها
ما بتسمعش أغنية كده كل فترة ؟! بنقع.

هل ده معنى كده خلاص إخربها بقى طالما
أنت رجعت مرة خلاص بقى خربت !

مهو الشيطان يخش لك من دي طالما أنت
وقعت اقع بقى - اقع بقى - خلاص بقى
إخربها بقى ، لأ هو أنا عبيط يعني مع لا
مؤاخذه ، أنت خدت مني جولة أديك المعركة
كلها ما ابقى غبي ، اه الشيطان خد منك جولة
- اه خد منك جولة - بس أنا إعمل ريمونتادا
أرجع أقوى من الأول.

ما هو كعب ابن مالك وقع يا جماعة ، كعب
بن مالك وقع. بس لما رجع رجع أحسن من
كعب بن مالك اللي قبل الايه ؟ اللي قبل

المعصية. فالإنسان يحسن الإعتذار إلى الله (سبحانه وتعالى) ويحسن الإفتقار.

طيب من الحاجات خدوا بقى ايه ؟ خدوا شوية علامات - علامات - إحنا قلنا اللي هو اللي فات ده كان شروط الإيه ؟ شروط التوبة.

اللي هقوله دلوقتي (**علامات قبول التوبة**)
طب أنا ثبت يا رب. إيه الدليل ؟ إيه الأمانة ؟
اللي تقول لي إن ربنا قبل مني ؟ عايزين
أمانة عايز حاجة كده إشارة تحسني إن أنا
اتقبلت. هنقوله دلوقتي (**علامات قبول التوبة**)
(

﴿ **من علامات قبول التوبة.** ﴾

☞ أن يكون الإنسان بعد التوبة أفضل مما قبل التوبة - بعد التوبة

يكون أحسن من قبل الإيه ؟ من قبل التوبة -
أنتم عارفين عمر (رضي الله عنه) في
صلح الحديبية ، - مشهور قوي في صلح
الحديبية - كان معترض زي كل الصحابة
على الصلح اللي حصل بين النبي (عليه
الصلاة والسلام) وبين المشركين ، وكلم
النبي (صلى الله عليه وسلم) كلام يعني
جامد شوية. أما قال للنبي (عليه الصلاة
والسلام) لما نعطي في ديننا الدنية ، ألسنا
على الحق وهم على الباطل ؟ وأقعد بقى يقول
كلام صعب يعني إزاي تقول للنبي (عليه
الصلاة والسلام) كده؟! بس هو يعني يعذر
لأن هو كان متحمس شوية ، فالمهم بعد ما
نزلت سورة الفتح وبعد ما تبين مصالح صلح
الحديبية. عمر بيقول : فندمت

☞ ندم أهو - ندمت على ما فعلت ، وعملت
لذلك أعمالاً.

وفي رواية فما زلت أصلي ، وأتصدق ،
وأصوم رجاء أن يغفر الله لي ما كان مني في
يوم الحديبية.

تاني ده سيدنا عمر. عمر الفاروق بص أعماله
عاملة إزاي، بس كل ما يفكر يوم الحديبية
بيقول أكثر من الصدقة ، والصيام ، والصلاة
وقراءة القرآن رجاء أن يغفر الله لي ما كان
مني في يوم الحديبية.

فمن الحاجات اللي تدل إن إنت ربنا قبل منك
التوبة أن يُلهمك فعل الخيرات، هي بس مش
التوبة إن أنا بطلت الذنب ده - في حاجات
ملحقات بقى - إن إنت في نفس الوقت

☞ تجد رغبة في فعل الخيرات

☞ تجد همّة في فعل الخيرات - تمام - تجد

إن أنت عايز تصلي ، عايز أتصدق ، عايز
أحفظ قرآن ، فتلاقي نفسك ألهمت طاعات
مكنتش في بالك ، إنت مثلاً كل اللي كان في
بالك عايزة ألبس واسع ، لبستي واسع ،
متعرفش (سبحان الله) لقيتي نفسك ألهمتي
عايزة أحفظ قرآن ، رُحتي دار ، إتصحبتني
على بنات كويسة ، طب يلا درس ، طب يلا
شنط رمضان ، طب يلا توزيع ملابس ، طب
يلا مجلس ذكر - إيه ده مكنتش عامله حسابي
على الحاجات دي - كون ربنا (سبحانه
وتعالى) هداكي لفعل طاعات كتير كده
وإتفتحلك أبواب الطاعة، وجدتي إن أنت بعد

التوبة اللي هي أصلاً مكنتش في حساباتك كل ده ، كان في حسابتنا

وجدتَ إن إنتِ بعد التوبة اللي هي أصلاً ما كانتش في حساباتك كل ده، كان في حساباتي إن أنا هلبس واسع، هبدأ أصلي الفرض وخلاص. الفرض جاب نفل، والواسع جاب درس، والدرس جاب قرآن ويلا إيه ده فيه إيه؟.

دي علامة قوية جداً إن ربنا قَبِلَ هذه التوبة، أن تكوني بعد التوبة خير مما قبل، وأن ييسر لك من العبادات ما لم يكن ميسراً قبل التوبة.

﴿ من علامات قبول التوبة: ﴾

☞ الخوف من عدم القبول.

□ وعدم الامن من مكر الله تعالى. ثاني من علامات قبول التوبة الخوف من عدم القبول، وعدم الامن من مكر الله. والافاة دي عادة التائب فى البداية، برضو انا بنبه ناس معينة دلوقتي هيفهموني، ويقولوا لي فى الكومنتات بيحصل معهم ولا لأ؟ فى العادة التائب فى البداية بيبقى فعلا خايف، وخايف إن ربنا ما يقبلوش، ونفسي ربنا يقبلاني، ونفسي ربنا يتوب علي والكلام ده، وما عندوش أمن من مكر الله، هو لسه كده جاي من الدنيا مش جاي من البوظان، لكن بيحصل افاة دي امتى ؟ خد بالك بتحصل بعد فترة طويلة من التوبة: يعني واحدة بقى منكم تائبة بقى لها خمس سنين عشر سنين، ما شاء الله حفظت القرآن كله، صلوات الله أكبر، نوافل ما فيش زي كده،

عبادات بقت جامدة جدا، هنا يحصل افة بتاعة
طول فترة التوبة دي اللي هي ايه؟ خد بالكم
اوعى تحصل لحد فيكم يحصل الأمن
الإطمئنان إلى القبول، الأمن من مكر الله،
وبالتالي يحصل نوع من الإعتماد على النفس،
ويحصل درجة من ضعف الإفتقار الى الله،
وتبدأ أنا تدخل فى التوبة، أنا حفظت قرآن،
أنا ثبتت، أنا الداعية، أنا الأخت المحفظة، أنا
التائبة، أنا أنا.

علامة سيئة جدًا، وغالبًا يحصل بعد ذلك
انتكاسة، "نسأل الله السلامة والعافية"، غالبًا
خد بالكم يحصل بعد الإحساس، الغرور ده
إنتكاسة، وإلانتكاسة دي بتكون تأديب من الله،
مش قتل ربنا مش بيدمرك، إنما بيأدبك؛ عشان
تعرف وترجع تاني تلم نفسك وتقول يا رب ما

ليش غيرك، يارب أنا ولا حاجة، يارب
اقلني، يارب أنا خايف ما تقبلنيش، يارب أنا
مش هأمن من مكرك تاني أبدًا. وهظل خايف
إلى أن ألقاك، (والذين يؤتون ما اتوا وقلوبهم
وجلّة. انهم ربهم راجعون). تمام؟، فالله
سبحانه وتعالى يحب التوابين، ويحب الإيّه؟
المتطهرين.

قال رجل للحسن بص الجملة دي انا طولت
عليكم فهختم كد بشوية كلمات جميلة، قال
رجل للحسن: أما يستحي أحدكم أن يذنب، ثم
يتوب، ثم يذنب، ثم يتوب؟! يعني الراجل
بيقول للحسن البصري يعني الواحد ما
بيستحيش منكم يغلط ويرجع، يغلط ويرجع،
يغلط ويرجع، فقال الحسن: ودّ الشيطان ودّ
الشيطان لو ظفر من أحدكم بهذه، ودّ الشيطان

لو ظفر من أحدكم بهذه، فلا تملوا، فلا تملوا،
فلا تملوا من الاستغفار، فلا تملوا من
الإستغفار.

من آداب التوبة كما قلنا: المسارعة،
المسارعة. أن تكون توبتك السريعة؛ لأنك كل
ما تأخر التوبة كل ما بتصعب المهمة، وكل ما
بتتورط فى الذنب كل ما يكون الخروج
أصعب، وكل ما كنت سريع فى التوبة كل ما
كان الأمر أسهل، وكل ما كان رجاء القبول
أعلى، رجاء القبول أعلى.

هختم لكم بكلام جميل لإبن القيم فى كتاب
مدارج السالكين، وهخلص اللايف على كده،
بيقول ابن القيم فى كتاب مدارج السالكين فى
منزلة التوبة، فى منزلة التوبة اسمعوا الكلام
ده معلش مش هعرف اشرحه، ولا اعيده، هو

هَيْتَقَالَ كَدَهُ وَأَنْتَ يَعْنِي وَدُنْكَ مَعِي، وَالْقَطْ
جَمَالَ الْكَلَامِ. فَبَيِّقُولُ فِي مَنْزِلَةِ التَّوْبَةِ ابْنُ الْقِيَمِ
فِي كِتَابِ مَدَارِجِ السَّالِكِينَ: أَمَرَكَ اللَّهُ بِشُكْرِهِ،
لَا لِحَاجَتِهِ إِلَيْكَ، وَلَكِنْ لَتُنَالَ أَنْتَ الْمَزِيدُ مِنَ
الْفَضْلِ، فَجَعَلْتَ تَكْفُرَ بِنِعْمِهِ، وَتَسْتَعِينُ بِنِعْمِهِ
عَلَى مَسَاخَطِهِ، أَمَرَكَ بِذِكْرِهِ.

أَمَرَكَ بِذِكْرِهِ لِيَذْكُرَكَ بِإِحْسَانِهِ، فَجَعَلْتَ نَسْيَانَهُ
سَبَبًا لِنَسْيَانِ اللَّهِ لَكَ { نَسُوا اللَّهَ فَنَسِيَهُمْ } [سُورَةُ
التَّوْبَةِ: ٦٧].

أَمَرَكَ بِسُؤَالِهِ لِيُعْطِيكَ فَلَمْ تَسْأَلْهُ، بَلْ أَعْطَاكَ
أَجَلَ الْعَطَايَا بِلا سُؤَالٍ: الْإِسْلَامُ، أَنْتَ اتَّوَلَدْتَ
مُسْلِمًا، أَعْظَمَ الْعَطَايَا بِلا سُؤَالٍ، فَلَمْ تَقْبَلْ عَلَيْهِ.
تَشْكُو مِنْ يَرْحَمُكَ، تَشْكُو اللَّهَ، إِلَى مَنْ لَا
يَرْحَمُكَ، تَشْكُو اللَّهَ إِلَى النَّاسِ.

وَتَتَّظَّلُ مِمَّنْ لَا يَظْلِمُكَ، وَتَدْعُ مَنْ يُعَادِيكَ
وَيَظْلِمُكَ. وَإِنْ أَنْعَمَ عَلَيْكَ بِالصَّحَّةِ وَالْعَافِيَةِ
وَالْمَالِ وَالْجَاهِ، اسْتَعْنَتْ بِنِعْمِهِ عَلَى مَعَاصِيهِ.

دَعَاكَ إِلَى بَابِهِ فَمَا وَقَفْتَ عَلَيْهِ وَتَرَكْتَهُ، ثُمَّ
فَتَحَهُ لَكَ فَمَا وَلَجْتَهُ.

أَرْسَلَ إِلَيْكَ رَسُولُهُ يَدْعُوكَ إِلَى دَارِ كِرَامَتِهِ،
فَعَصَيْتَ الرَّسُولَ، قُلْتَ لَا أَتْرُكُ مَا أَرَاهُ لَشَيْءٍ
سَمِعْتُ بِهِ، وَمَعَ هَذَا فَلَمْ يُبَيِّسْكَ مِنْ رَحْمَتِهِ، بَلْ
قَالَ لَكَ: مَتَى جِئْتَنِي قَبْلُوكَ، إِنْ أَتَيْتَنِي لَيْلًا
قَبْلُوكَ، وَإِنْ أَتَيْتَنِي نَهَارًا قَبْلُوكَ، وَإِنْ تَقَرَّبْتَ
مَنِي شَبْرًا تَقَرَّبْتَ مِنْكَ ذِرَاعًا، وَإِنْ تَقَرَّبْتَ مِنْي
ذِرَاعًا تَقَرَّبْتَ مِنْكَ بَاعًا، وَإِنْ مَشَيْتَ إِلَيَّ
هَرُولًا إِلَيْكَ، وَلَوْ لَقِيتَنِي بِقُرَابِ الْأَرْضِ
خَطَايَا ثُمَّ لَقِيتَنِي لَا تَشْرِكُ بِي شَيْئًا، أَتَيْتَكَ
بِقُرَابِهَا مَغْفِرَةً، وَلَوْ بَلَغَتْ ذُنُوبُكَ عَنَانَ السَّمَاءِ

ثم استغفرتني غفرت لك، ومن أعظم مني
جودًا وكرمًا. عبادي يبارزونني بالعظائم، وأنا
أَكْلَاهُمْ عَلَى فُرُشِهِمْ (يعني: ارزقهم وهم على
فُرُشِهِمْ). إني والجن والانس في نبأ عظيم،
أَخْلُقُ وَيُعَبَّدُ غَيْرِي، أَرْزُقُ وَيُشْكِرُ سِوَايَ،
خَيْرِي إِلَى الْعِبَادِ نَازِلٌ، شَرَّهُمْ إِلَيَّ صَاعِدٌ.
أَتَحَبَّبُ إِلَيْهِمْ بِنِعَمِي وَأَنَا الْغَنِيُّ عَنْهُمْ،
وَيَتَبَغَضُونَ إِلَيَّ بِالْمَعَاصِي وَهُمْ أَفْقَرُ شَيْءٍ
إِلَيَّ. مَنْ أَقْبَلَ إِلَيَّ تَلْقَيْتَهُ مِنْ بَعِيدٍ، وَمَنْ أَعْرَضَ
عَنِّي نَادَيْتَهُ مِنْ قَرِيبٍ، وَمَنْ تَرَكَ لِأَجْلِي
أَعْطَيْتَهُ فَوْقَ الْمَزِيدِ، وَمَنْ أَرَادَ رِضَايَ أَرَدْتُ
مَا يَرِيدُ، وَمَنْ تَصَرَّفَ بِحَوْلِي وَقُوَّتِي أَلْنْتُ لَهُ
الْحَدِيدَ. أَهْلُ ذِكْرِي أَهْلُ مَجَالِسَتِي، وَأَهْلُ
شُكْرِي أَهْلُ زِيَادَتِي، وَأَهْلُ طَاعَتِي أَهْلُ
كَرَامَتِي، وَأَهْلُ مَعْصِيَتِي لَا أَقْضِيهِمْ مِنْ

رحمتي، إن تابوا إليّ فأنا حبيبهم، فإنّي أُحب
التوابين، وأحب المُتَطَهِّرين، وإن لم يتوبوا إليّ
فأنا طيبٌ بهم، ابتليهم بالمصائب، ابتليهم
بالمصائب لأُطَهِّرَهم من المَعائب.

من آثرني على سواي آثرته على سواه.
الحسنة عندي بعشر أمثالها، إلى سبعمئة
ضعف، إلى أضعاف كثيرة، والسيئة عندي
بواحدة، فإن ندم عليها واستغفرتني غفرتها له.

أشكر اليسير من العمل، وأغفر الكثير من
الزّل، رحمتي سبقت غضبي، وحلمي سبق
مؤاخذتي، وعفوي سبق عقوبتي.

أنا أرحم بعبادي من الوالدة بولدها، لله أشد
فرحًا بتوبة عبده من رجلٍ أضلّ راحلته
بأرضٍ مُهلِكة، عليها طعامه وشرابه، فطلبها
حتى إذا آيس من حصولها نام في أصل شجرة

ينتظر الموت، فاستيقظ فإذا هي على رأسه قد
تعلق خطامها بالشجرة، فالله أفرح بتوبة عبده
من هذا الرجل براحتيه، وهذه فرحة إحسان
وبر و لطف، لا فرحة محتاج الى توبة العبد،
منتفع بها. وكذلك موالاته لعبده إحسانًا إليه
ومحبة وبر لا يتكثّر بها من قلة، ولا يتعزّز
بها من ذلّة، ولا ينتصر بها من غلبة، ولا يعدّه
لنائبة، ولا يستعين به في أمر { وَقُلِ الْحَمْدُ لِلَّهِ
الَّذِي لَمْ يَتَّخِذْ وَلَدًا وَلَمْ يَكُنْ لَهُ شَرِيكٌ فِي الْمُلْكِ
وَلَمْ يَكُنْ لَهُ وَلِيٌّ مِّنَ الدُّنْيَا وَكَبِّرَ تَكْبِيرًا }
سورة الإسراء: الآية ١١١) الله أكبر.

فهذه منزلة التوبة، وهذه أسرار التوبة،
وشروط التوبة، ومحفزات التوبة.

■ ياريت اللي يقدر يعمل تلخيص ممتاز
للايف ده زي ما قلنا في بداية اللايف، الواجب
نعمل تلخيص كويس للايف ده،

■ نمرة اتنين: تكتب القرارات اللي إنت
هتطلع بيها دلوقتي النهاردة من اللايف ده، في
مسابقة، في صفحة اسمها: (دورات المهندس
علاء حامد) دوروا عليها، اللي مش فيها أو
ابعتوا اللينك دلوقتي، في صفحة اسمها:
(دورات المهندس علاء حامد) خشوا عليها
دلوقتي هتلاقوا بوست فيه: مين هيعمل أحسن
تلخيص؟ وأحسن قرارات؟ إن شاء الله هيبقى
له نوع من التكريم. يلا روحوا دلوقتي لايف.
أنا مبسوط قوي باللايف الجميل ده.

يا رب اللهم تب علينا لنتوب، اللهم اغفر لنا
الذنوب. اللهم تب على أوساط المسلمين، اللهم
ألحقنا بالصالحين وتوفنا مسلمين.

**جزاكم الله خيرا أحبة السلام عليكم ورحمة الله
وبركاته.**